

光緒山西通志

名宦錄二

錄一之二

山西通志第一百二

賜進士出身頭品頂戴兵部侍郎兼都察院右副都御史巡撫山西提督軍務臣張煦奉  
旨監修

臺司

五代至元

張憲莊宗時爲北京留守莊宗及難聞鄴中兵士推戴明宗  
憲部將符彥超將應之張昭謂憲曰得毋奉表勸進爲自安  
之計乎憲曰我本書生見知主上位至保釐乃布衣之極苟  
視顏求生何面目見主於地下昭曰此古人之志也公能行  
之死且不朽矣相泣而去憲遂死之時論重昭能成憲之節  
時有害昭者昭曰明誠取至期不再生主辱臣亡死而無悔  
眾執之以送彥超彥超曰推官正人無得害之又逼昭爲勝  
安撫軍民事甯以昭爲北京留守推官

右後唐一人

李筠太原人仕周爲昭義軍節度使宋太祖受禪加中書令使者至潞欲拒之賓佐切諫乃宴使者酒半懸周太祖像涕泣不已賓佐惶駭告使者曰令公被酒失其常性幸無訝北漢主聞之以蠟書約筠同舉兵太祖手詔撫慰且官其子筠終不聽北漢主親將來會筠言受周太祖厚恩不敢愛死周漢仇也以故漢主不悅留監軍而返筠遂南據澤州戰敗而死

右後周一人

潘美字仲詢大名人周高平之戰以功遷西上閤門副使宋開寶八年秋副党進攻太原戰於汾上破之且多俘獲太平興國四年爲北路都招討判太原行府事部分諸將進討并

遂平命兼三交都部署留屯以扞北邊三交西北三百里名  
固軍其地險阻爲北邊咽喉美潛師襲之遂據有其地因積  
粟屯兵以守之自是北邊以甯美嘗巡部至代州旣秣馬尊  
食俄而遼兵萬騎逼塞美誓衆銜枚奮擊大破之雍熙三年  
詔美及曹彬崔彥進等北伐美獨拔寶朔雲應等州詔內徙  
其民會楊業敗於陳家谷坐削秩三等明年復檢校太師尋  
改都部署判并州加同平章事數月卒贈中書令謚武惠  
文彥博字寬夫介休人第進士知翼城縣通判絳州擢殿中  
侍御史黃德和誣劉平降戎以金幣賂并奴使附已說以證  
平家二百口皆械繫詔彥博置獄於河中鞠治得實德和黨  
援盛謀反其獄遣他御史來彥博拒不納曰朝廷慮獄不就  
故遣君今案具矣宜亟還事或弗成彥博執其咎德和并奴

卒就誅以直史館爲河東轉運副使鄜州餉道回遠銀城河  
外有唐時故道廢弗治彥博父洎爲轉運使日將復之未及  
而卒彥博嗣成父志益儲粟元昊來寇圍城十日知有備解  
去累拜同平章事封潞國公尋以尙書左僕射判太原府治  
平中入爲樞密使凡九年引去拜河東節度使復加兩鎮以  
太師致仕紹聖初卒謚忠烈

高瓊濠州蒙城人太宗召置帳下從征太原命押弓弩兩班  
合圍攻城後爲并州馬步軍都部署時潘美在太原舊制節  
度使領軍職者居上瓊以美舊臣奏請居其下從之戎兵有  
以廩食陳腐譁言者瓊知之適出巡諸營士卒方聚食因取  
其飯自啖之謂眾曰今邊鄙無警爾等坐飽甘豐宜知幸也  
眾言遂息尋改鎮州部署眞宗初復任并代部署咸平中上

親巡河朔遣楊允恭馳召瓊率所部出土門與石保吉會鎮  
定兵罷復還本任轉運使言其政績詔褒之咸平三年召還  
終檢校太尉忠武軍節度使

雷有終字道成同州郃縣人德驥子太宗時德驥任陝西轉  
運奏爲解州通判特許德驥不巡察是州有終入奏鹽池利  
害令還又權知軍事省通判洎化三年知并州貢宗加工部  
侍郎二年代還旋平蜀寇景德中爲并代副都部署賜黃金  
四百兩內艱起復辛澶淵詔率所部由土門抵鎮州與大兵  
會時王超桑贊逗撓唯有終赴援威聲甚振河北列城賴其  
雄張俄而遼修好命還屯所就判并州召拜宣徽北院使卒  
有終沈敏善斷能撫士卒豐宴犒官嘗展爲僨宿負千萬云  
王嗣宗汾州人開寶八年進士第一至道中爲河東轉運使

咸平中知并州兼并代部署州境有卧龍王廟每窮冬闔境致祀值風雪嚴寒老幼踏於道嗣宗亟毀之轉運使鄭文寶上其政績有詔褒美先是西邊市馬以給北邊戰士有瘠弱者卽送闕下暑月道遠多斃嗣宗建議以汾州地涼樓煩諸監美水草請就放牧從之召拜御史中丞仕至樞密副使卒謚景莊

張進兗州曲阜人咸平三年任并代副都部署李繼遷寇麟州州將遣單介問道乞師太原諸將以無詔旨猶豫未決進獨抗議發兵赴援旣至而圍解手詔褒美進侵中山命率廣銳二萬騎由土門會兵鎮定未至而敵遁復歸晉陽景德元年卒上遣中使護喪還京

李繼勳大名元城人太祖平澤潞繼勳以安國節度朝行在

卽以爲昭義軍節度使秋燔平遙建隆二年又敗并軍乾德二年下遼州又大敗遼師于遼五年加同平章事開寶初爲行營前軍都部署勝于洞渦二年親征河東又爲行營前軍都部署棚太原城南三年移大名卒贈中書令

楊業太原人北漢建雄軍節度使歸宋爲代州刺史兼三交駐泊兵馬都部署屢敗遼師遷雲州觀察使仍判代州雍熙三年爲雲應路副都部署連拔雲應寰朔四州命護四州民入內地力戰陳家谷口被執不食卒子延昭時以供奉官爲先鋒戰朔州城下流矢貫臂鬪益急仕至高陽關都部署張亢字公壽臨濮人第進士仁宗時夏人自後河川襲府州縱遊騎鈔麟府間時豐州已破麟府勢孤朝廷議棄河外守保德軍未果以亢爲并代都鈐轄管勾麟府軍馬事戰於免



毛川敵大潰斬二千級不踰月築清塞百勝中候建甯鎮川  
五堡麟府路始通亢復奏請增並邊諸柵以相維持則可以  
廣田牧壯河外之勢議未下徙并代副都總管御史梁堅劾  
亢出庫銀給牙吏往成都市易奪引進使爲本路鈐轄及夏  
人與遼戰河外復引進使副都總管知代州兼河東沿邊安  
撫事范仲淹宣撫河東復奏亢前所增廣堡砦宜使就其事  
詔旣下明鎬以爲不可屢牒止之亢曰受詔置堡砦豈可得  
經畧牒而止耶坐違節度死所甘心堡砦必爲也每得牒置  
案上督役愈急及成乃發封自劾朝廷置不問蕃漢歸者數  
千戶歲減戍兵萬人河外遂爲并汾屏蔽徙知瀛州校陝西  
轉運使言亢所易庫銀非自入者累遷徐州總管卒亢好施  
輒財凡燕犒饋遺類皆過厚至遣人貿易助其費猶不足以

此人樂爲之用馭軍嚴明所至有風蹟民圖像祠之

向敏中字常之開封人太平興國五年進士太宗擢同知樞密院事咸平初拜參知政事議遣重臣慰撫邊郡命爲河北河東安撫大使陳堯叟馮拯副之發禁兵萬人翼從所至訪民疾苦宴犒官吏莫不感悅四年同平章事出知永興晉左僕射卒謚文簡

馮行已拯子皇祐中知代州管幹緣邊安撫事時河西番部盜耕屈野河西田言不宜以細故啟大釁但加戒戢足矣五臺山寺調廂兵義勇繕葺爲除和糴穀三萬言不可損歲入之儲以事不急之務終金州觀察使

杜衍字世昌越州山陰人第進士以著作佐郎知平遙縣使者薦之通判晉州詔舉良吏擢知乾州以太常博士提點河

東路刑獄遷尙書祠部員外郎按行潞州折冤獄知州王曙  
爲作辨獄記高繼昇知石州人告繼昇蓄族謀變逮捕繫治  
久不決行辨其誣抵告者罪甯化軍守將鞠人死罪不以實  
衍覆正之守將不伏辨之詔爲置獄果不當死復爲河東轉  
運副使以工部侍郎知并州元昊拒命以太原要衝加龍圖  
閣學士再遷同知樞密院事改樞密副使爲河東宣撫使還  
拜樞密使遼夏戰黃河外火山保德軍皆警衍曰二國方交  
鬪勢必不來我兵不可妄出旣而果驗拜同平章事兼樞密  
使罷政卽致仕封祁國公卒

范仲淹字希文蘇州吳縣人舉禮部第一遂第進士天聖七  
年通判河中府慶厯中拜樞密副使改參知政事黨論興請  
行邊爲河東陝西宣撫使至汾州民遮道數百趨訴仲淹以

付張燾奕局未終處決已竟上賜黃金百兩悉分遺邊將解  
州新羅太寇言者多請棄之仲淹爲修故砦招還流亡三千  
餘戶蠲其稅罷權酤予民又奏免府州商稅河外遂安尋罷  
政事爲陝西四路宣撫使復請郡遷戶部侍郎知潁州卒謚  
文正

种師道字彝叔世衡孫嘗知渭州帥陝西河東七路兵征賊  
底城期旬日入日而拔燕山之役忤童貫致仕起爲憲州刺  
史知環州靖康中爲太尉鎮洮軍節度使河北河東宣撫使  
實無兵自隨請合開河卒屯滄衛孟滑格不用旣而師中戰  
沒姚古敗召還太原陷又使巡邊尋卒謚忠憲

彌大河東宣撫使以請分兵爲腹背劫攻之圖故有是命張  
師正敗績於河東大誅之

李綱字伯紀無錫人政和進士靖康初爲尙書右丞親征行營使後罷右丞充京城四壁守禦使除知樞密院事耿南仲忌之曰欲援太原非綱不可乃以爲河東北宣撫使御批曰促解太原圍而諸將皆專達宣撫使徒有節制之名勾罷遂召赴闕尋落職建炎初拜右僕射晉左請料理河北河東尋又罷卒謚忠定

李若拙字藏用京兆萬年人舉拔萃又舉進士又登賢良方正直言極諫科太平興國中以右補闕同勾當河東轉運兼雲應等八州事嘗詣闕言邊事太宗嘉之咸平中以右諫議大夫使河朔按邊事卒

索湘字巨川滄州鹽山人開寶六年進士太宗時爲河東轉運使以忻州推官石宗道憲州錄事胡則爲幹職所至州郡

勾檢其簿領二人後皆厯清要終右諫議大夫知廣州

姚鉉字寶之廬州合肥人太平興國進士至道中以右司諫爲河東轉運使上言曰伏見諸路官吏或疆明泄事惠愛及民者則必立教條除其煩擾然狡胥之輩非其所便候其罷官悉藏記籍害公蠹政莫甚于此禮云其人存則其政舉其人亡則其政息又語曰舊令尹之政必告新令尹斯實聖人之格言國家之急務也欲望所在官吏有經畫利濟事可長久者歲終書厯受代日錄付新官俾之遵守若事有非者便聽上聞俟報改正詔從之咸平中移邾州終起居舍人鉉嘗纂唐文粹云

王陟上黨人消化進士補嵐州團練推官內侍羅懷嗣言其督運有勞遷晉州觀察推官咸平初以太常博士爲河東轉

運使賜金紫屢遣裁度邊事趙保吉納款正其經界代歸卒  
鄭文寶字仲賢太平興國八年進士咸平中任河東轉運使  
嘗上言管內廣銳兵萬餘難得資糧請徙置近南諸州又欲  
使強壯戶市馬備征役宰相李沆等言不便復令文寶條對  
文寶執前議且言土人久留恐或生事議卒罷先是麟府屯  
重兵皆河東輸饋雖地里甚邇而限河津之阻土人利於河  
東民罕至則芻粟增價上常訪使邊者言河裁濶數十步乃  
詔文寶於府州定羌軍經度置浮橋人以爲便會繼遷圍麟  
州令乘傳晨夜赴之聞解遷刑部員外郎賜金紫景德元年  
冬遼人犯邊又徙河東文寶安集所部募鄉兵張邊備又領  
番漢兵赴河北手詔褒諭後以兵部員外郎卒

薛顏萬泉人舉三禮中第累官河東轉運使祀汾陰徙陝西

河中浮橋歲爲水所敗顏卽北岸醜上流爲支渠以役水怒因取渠水溉其旁田民頗利之終光祿卿

孫冲字升伯趙州平棘人真宗時舉明經又舉進士厯通判晉州絳州至河東轉運使會南郊賞賜軍士而汾州廣勇軍所得帛不逮他軍一軍大譟捍守佐堂下劫之約與善帛乃免城中戒備遣兵圍廣勇營冲適至命解圍弛備置酒張樂推首惡十六人斬之遂定初守佐以亂軍所約者上聞詔給善帛使者至路冲促之還曰以亂而得所欲是愈誘之亂也卒留不與後以直史館知河中府徙潞州復爲河東轉運使以諫議大夫知潞州遷翰林學士官至給事中卒

宋樽字鵬舉萊州掖人開寶中得第真宗初以司封員外郎爲河東轉運使上言大通監冶鐵盈積可備諸州軍數十年



鼓鑄願權罷采紆民又請料諸州丁壯爲兵以增戎備在任凡十一年時河東邊事未息屯師尙廣搏經制漕運以幹治稱屢以秩滿請代朝議以搏善職就加祠部郎中賜金紫常薦代州承受使臣王白上以本置此職止於視軍政察邊事搏不應保奏因詔諸路自今勿得舉承受使臣景德四年召搏尋使遼卒

陳若拙幽州盧龍人思讓子太平興國五年進士甲科真宗時授河東轉運使賜金紫會親祀汾陰若拙以所部緡帛芻粟十萬輸河中以助費經度制置使陳堯叟言其幹職擢拜右諫議大夫以給事中卒

陳堯佐字希元閩州閩中人父省華樓煩令仕至權知開封府堯佐進士及第真宗時爲河東路轉運使以地寒民貧仰

石炭以生竄除其稅又減澤州大廢冶鐵課數十萬仁宗時知并州每汾水暴漲州民輒憂擾堯佐爲築隄植柳萬株作柳溪民賴其利尋召同修三朝史累拜樞密副使參知政事同平章事卒謚文惠

張逸字大隱鄭州滎陽人第進士仁宗時爲河東轉運使見宋史循吏傳

任顥字誠之青州壽光人同學究出身爲夏諒祚冊禮使采西夏風物山川道里出入攻取之要爲治戎精要三篇上之進直史館遷河東轉運使上嘗以禁帑金帛賜河北亦欲與河東顥辭曰受委制財用而先有求不敢顥爲使者每行部必擇僚佐之賢者一人與俱凡事必與議未嘗以胥吏自隨人安其政積官戶部侍郎卒

張奎字仲野臨濮人第進士爲并州推官以待御史爲河東轉運使又以天章閣待制爲河東都轉運使終樞密直學士奎風力精強所至有治蹟吏不敢欺與弟亢皆知名一時云楊偕字次公坊州中部人第進士康定中以龍圖閣直學士知河中府劉平石元孫戰沒偕聞乃僞爲書馳告延州曰朝廷遣救兵十萬至矣命傍鄆縣大具芻糧什器以俟比書至賊已解去又爲河東轉運使詔選三路民爲兵偕言方今兵不少多而不練其勢易敗又困國而難供尋知并州元昊入寇密詔偕選強壯萬人策應麟府偕奏師無紀律則士不用命今發農兵赴邊慮在路逃逸及臨陣退縮請以軍法從事詔如所請并人大驚都轉運使文彥博奏罷之有中官預軍事素橫前帥優遇之偕至一繩以法命率所部兵從副總管

赴河外戒曰遇賊將戰一票副總管節度中人不服捧檄訴  
偕叱曰汝知道主帥命卽斬首乎監軍怖汗不覺墮笏翌日  
告病尋卒於是軍政肅然元昊大掠河外詔修甯遠砦偕言  
甯遠砦在河外介麟豐二州之間無水泉可守請建新麟州  
於嵐州有白塔地可建砦屯兵上諭偕速脩甯遠砦以援麟  
州旋授本路經畧安撫招討使賜錢五十萬偕列六事於朝  
一罷中人預軍事二徙麟州三以便宜從事四出穴師五募  
武士六專捕援且曰能用臣言則受命不然則已朝廷不從  
乃罷知邢州後以工部侍郎致仕卒

陳貫字仲通自安陽徙河陽第進士歷河東轉運使以直昭  
文館卒貫泄官嚴檢覈嘗曰視縣官物如已物容有好乎而  
尤喜言兵云

王沿字聖源大名館陶人第進士累官河東都轉運使加龍  
圖閣直學士知并州時元昊數寇河東建議徙豐州不報  
何邲字聖從成都人第進士仁宗時遍歷三院以龍圖閣直  
學士爲河東都轉運使故相梁適帥太原病不能事內臣蘇  
安靜鈐轄兵馬怙寵不法皆劾奏之致仕卒

張景憲字正國河南人師德子以父任官至戶部副使命視  
撫甯囉兀兩城言城不可守固不待到而後知也未幾撫甯  
陷又言囉兀邈然孤城鑿井無水將何以守加集賢殿修撰  
爲河東都轉運使議者欲分河東爲兩路景憲言本道地肥  
磽相雜州縣貧富亦異正宜有無相通分之不便議遂寢後  
以大中大夫卒景憲居官不畏強禦仁宗時多舉刺熙甯後  
不効一人尤爲有守云

周沆字子真青州益都人仁宗時第進士以直史館爲河東轉運使盜鑄鐵錢法不能禁沆高估錢價鑄者無以自利乃息後再爲河東轉運使以戶部侍郎致仕卒

明鎬字化基密州安邱人第進士薛奎薦其沈鷟有謀能斷大事夏人破豐州以天章閣待制爲河東都轉運使修建甯中候百勝砦鎮川清寨堡凡五城以勞遷左司郎中踰年擢龍圖閣學士知并州鑲大巡邊以備賊時邊任多執袴子弟取尤不職者杖之疲軟者皆自解去遂奏擇習事者守堡砦軍行妓者多從鎬欲驅逐惡傷士卒心曾有忿爭殺妓女吏執以白鎬曰彼來軍中何耶縱去不治妙聞皆散去後平王則入爲參知政事卒謚文烈

李復圭字審言淑子賜進士出身歷河東轉運使以集賢殿

修撰卒復圭臨事敏決稱健史

孫長卿字次公揚州人以外祖朱巽任入官英宗時爲集賢院學士河東都轉運使終兵部侍郎長卿長於政事爲能臣性潔廉不以一毫取諸人詔中使護其喪歸葬

閻詢字讓道鳳翔天興人第進士以直龍圖閣爲河東轉運使言三路土兵疲老者聽其族以強壯代從之進集賢殿修撰知河中府大河漲壞浮橋詢易爲長橋神宗時加右諫議大夫卒

劉庠字希道彭城人第進士熙甯初除集賢殿修撰河東轉運使計一路之產鐵利爲饒請復舊冶鼓鑄通隰州鹽礬博易以濟用又請募民入粟塞下預爲足食計移河北又爲河東都轉運使後以論新法忤王安石爲龍圖閣直學士知太

原府請復憲州募民子弟剝銳工技擊者籍爲勇敢倣漢謫  
戍法貫流以下罪徙實河外遼人建牙雲中遣騎涉內地邊  
吏執之遼檄取紛然又遣使議疆事衆疑其造兵端欲大爲  
備庠奏言雲中歲儉軍無見糧契丹張形示疆造端首禍曲  
在彼不在我願勿聽先諭以理然後備兵觀釁上嘉使者詞  
順訖以黃鬼山分水嶺立新疆遭母喪歸元祐加樞密直學  
士卒

李師中字誠之楚邱人第進士熙甯初拜天章閣待制河東  
都轉運使移秦州詔賜以班超傳王韶呂惠卿忌之貶卒師  
中明而恕去官日民擁道遮泣馬不得行杜衍范冲淹富弼  
皆薦其有王佐才云

陳安石字子堅河陽人貢子鎖廳及第歷使河東知河中府



熙甯中韓絳鎮太原議行鹽法與監司多不合以安石爲河東都轉運使議始定謂其僚曰與事常有漸急則擾乃出鹽付民而給之券使隨取得貿易鬻畢而歸券私販爲減官軍西征王中正帥東師而西報安石持四十日糧而師駐白草坪彌月安石卽擅發民供餉李舜舉劾其專詔置獄於路安石自麟州會逮俄而他路餽糧多不繼上察其無罪赦之召爲戶部侍郎後爲龍圖閣直學士卒

張問字昌言襄陽人第進士熙甯中爲集賢殿修撰河東轉運使坐事貶知光化軍屢言常平助役之苦語切直驚人歷知潞州官至給事中卒

孫覽字傳師高郵人覺弟第進士神宗時以右司員外郎爲河東轉運副使以直龍圖閣知河中府後與蔡京論役法不

合又以龍圖閣直學士知太原府夏人據橫山並河爲寨覽  
謀復取葭蘆戍險阻夏人數萬屯境上覽下令吾兵少須滿  
五萬及西夏人聞而濟師覽不爲動相持益久忽令具糗糧  
嚴兵械曰敵至矣居數日果大入覽奮擊敗之遂城葭蘆而  
還策勳加樞密直學士卒

崔嶧長安人進士及第累官河東轉運使會更錢法潞州大  
擾推其首惡誅之人心遂定後歷知同州鳳翔河中以刑部  
侍郎致仕

馬默字處厚單州城父人第進士受學於石介元祐中爲河  
東轉運使時議棄葭蘆吳堡二砦默奏控扼險阻敵不可攻  
棄之不便由是二砦得不棄以致仕復寶文閣待制卒紹興  
中贈太保

張燕字景元臨濮人奎子才智敏給第進士從范仲淹使河東至汾州民遮道數百趨訴仲淹以付燕方與客奕局未終處決已竟提點河東刑獄以天章閣待制爲陝西都轉運使蒲津浮橋壞鐵牛皆沒水中燕以策列巨木於岸以爲衡繩石其杪挽出之橋復其初神宗時由給事中易通議大夫卒程師孟字公闢吳人第進士提點河東路刑獄勸民出錢開渠築堰溉良田萬八千頃仕至集賢殿修撰卒師孟累領劇鎮爲政簡而嚴發隱摘伏如神所部肅然

掌禹錫字唐卿許州鄆城人第進士通判并州累官提點河東刑獄杜衍薦之英宗時以工部侍郎致仕卒禹錫矜慎畏法好儲書所記極博撰皇祐方域圖志地理新書於河東亦有裨云

齊恢字熙業蒲陰人第進士英宗時提點河東路刑獄凡公幣格外餽餉之物一無所受終天章閣待制恢臨政明白簡約不苛擾所至民愛之

張商英字天覺蜀州新津人負氣倣儻豪視一世元祐初爲開封府推官出提點河東路刑獄游五臺霍山間大觀四年除中書侍郎遂拜尙書左僕射變蔡京政時稱忠直斥外京復用以觀文殿大學士卒靖康喪司馬光范仲淹亦贈太保紹興賜謚文忠

陳次升字當時興化仙游人第進士元祐中提點河東刑獄終寶文閣待制嘗累論章惇蔡卞曾布蔡京語尤切直

畢仲游字公叔雲中人士安曾孫第進士元祐中提點河東刑獄時韓縝以故相在太原按視如列郡縝奴告有卒剽其

衣於公堂之側。纒怒將置卒於理。仲游曰：「奴衣服尠薄而敢掠之於帥牙，非人情。取以付獄，治卒得免。」太原銅器名天下，獨不市一物，懼人以爲矯。將行，買二茶匕而去。纒曰：「如公叔可謂真清矣。」召拜職方司勳二員外郎，後入黨籍卒。

范祥字晉公，邠州三水人。第進士，歷官陝西曉達財利，建議變鹽法，後人不敢易，稍加損益，人輒不便，以提點陝西路刑獄制置解鹽，累遷度支員外郎，權陝西轉運副使，坐城啞兒峽削一官，後復官，提舉陝西緣邊青白鹽改制置解鹽使。卒嘉祐中，包拯言祥通陝西鹽法行之十年，歲減榷貨務使緡錢數百萬，其勞可錄，官其子孫景郊社齋郎。

包拯字希仁，廬州合肥人。第進士，累官陝西轉運使，入爲三司戶部副使，解州鹽法，率病民，拯往經度之，請一切通商販

後以龍圖閣直學士權知開封府拜樞密副使卒謚孝肅極性峭直惡吏苛刻務敦厚雖甚嫉惡而未嘗不推以忠恕也平居無私書嘗言後世子孫仕宦有犯賊者不得放歸本家云

薛向字帥正萬泉人祖蔭入官神宗時權陝西轉運副使制置解鹽凡支十年歲調畦夫數千向奏損其數坐事罷數月復爲陝西轉運副使督使凡將漕八年所入鹽馬芻粟數累萬民不益賦其課爲最坐事罷知絳州移潞州神宗知向才累擢至同知樞密院出外卒謚恭敏

孫永字曼叔長社人第進士歷陝西都轉運使時邊用不足以解鹽市馬別爲一司外臺不得與永奏鹽馬國之大計使主者專其柄既無以統隸苟爲非法孰得而制之元豐中知

太原府忻代產鹽苦惡不堪食轉運必欲理之以盜販闌越之罪罪兵吏永言鹽民食也不可禁兵武備也不可闕顧以惡鹽累防兵非計也詔弛其禁元祐中加資政殿學士卒謚康簡

右宋五十六人

以帥臣撫臣轉運提刑司鹽倉次

耶律撒剌

語解作薩喇

性忠直沈厚清甯初累遷西南面招討使

以治稱後爲耶律乙辛

語解作伊遜

黨誣首被害

蕭速撒

語解作蘇色

突呂不

語解作圖魯卜

部人性沈毅清甯中爲彰國

軍節度使咸雍十年以北院樞密副使經略西南邊撤宋堡障戍以皮室軍上嘉之後爲耶律乙辛黨誣告被害與撒剌

胥繪像宜福殿

耶律頗的

語解作佛的

系出季父房咸雍八年爲彰國軍節度使

道宗獵大牢古山頗的謁於行宮帝問邊事對曰自應州南境至天池皆我耕牧之地清甯間邊將不謹爲宋所侵烽埃內移似非所宜道宗然之拜北面林牙後遣人使宋得其侵地命頗的往定疆界累遷北院樞密使卒

右遼三人

完顏宗翰本名粘沒喝

語解作尼瑪哈

漢語訛爲粘罕

語解作尼堪

國相

撒改之長子也年十七軍中服其勇及議伐遼宗翰與太祖

意合天輔五年五月射柳上曰今議西征汝前後計議多合

朕意宗室中雖有長於汝者若謀元帥無以易汝遂爲移資

勃極烈

語解作拉齊貝勒

十一月副都統杲西征駐軍北安獲遼護

衛耶律習泥烈

語解作實訥埒

知鴛鴦濼虛實使釋盃

語解作溫都

移刺

語解作伊喇

報杲曰攻取之策幸速見論若有異議此當以



偏師討之杲使奔睹來報曰頃奉詔旨不令便趨山西時宗  
翰已整衆俟兵期恐待杲再約或失機會卽決策進兵使移  
刺保復往曰詔旨亦許便宜從事今一失機會後難圖矣杲  
乃約會議於奚王嶺杲軍出青嶺宗翰軍出瓢嶺期於羊城  
灤會軍宗翰以精騎六千襲遼主聞遼主自五院司來拒賊  
乃倍道兼行一宿而至遼主遁去使希尹追之西京復叛耿  
守忠以兵五千來救至城東四十里蒲察烏烈谷赦先擊之  
斬首千餘宗翰及宗雄宗幹宗峻繼至宗翰率麾下自其中  
衝擊之使餘兵去馬從旁射之守忠敗走其衆殲焉時宗翰  
弟扎保語解作扎巴台沒於陣戰不輟遂撫定西京州縣部族從  
太祖至燕復從至鴛鴦灤太祖歸以宗翰爲都統昱幹魯副  
之駐軍雲中經畧夏國夏奉表稱藩晉左副元帥自太原路

伐宋發河陰降朔州克代州遂圍太原府時宗望自河北趨

汴久不聞問遂留銀朮可

語解作尼楚非

等圍太原率師而南降定

諸縣及威勝軍下隆德府至澤州宋路允迪以割太原詔書

來太原人不受命宗翰取文水及孟縣復留銀朮可圍太原

而還駐西京八月復發西京九月丙寅克太原鵲沙虎

語解作呼

沙取平遙降靈石介休諸縣十一月甲子自太原趨汴降威

勝軍克隆德府遂取澤州撒剌荅

語解作薩喇達

等先已破天井關

乃渡河至汴焉宗翰請河北河東府鎮州縣擇前資官良能

者授之以安新民又以河東寇盜尙多分留將士夾河屯守

而還師山西上命婁室等平陝西銀朮可守太原耶律余覲

留西京而宗翰會軍黎陽津焉天會末晉國論右勃極烈兼

都元帥熙宗初拜太保尙書令領三省事封晉國王十四年

卒謚桓忠配享太祖廟庭

毛碩字仲權甘陵人天德中爲河東南路轉運使上言頃者  
定立商酒課不量土產厚薄戶口多寡及今昔物價之增耗  
一均理責之故監官被繫失身破家折備盜竄或爲姦吏盜  
有錢錢而以賒券輸官故河東有積負至四百餘萬貫公私  
苦之請自今禁約酒官不得折準賒貸惟許收用實錢則官  
民俱便至後行之致仕卒

張亨字彥通大興朔陰人登皇統六年進士第大定二十五  
年自戶部尙書出爲絳陽軍節度使上曰張亨近令補外頗  
爲衆議所歸章宗初置九路提刑司時方重其選上以亨爲  
河東南北路提刑使兼勸農採訪事訪其利病條爲十三事  
以聞上嘉納之亨在職每事存大體畧苛細御史以寬緩不

事事効之降蔡州防禦使後致仕卒亨才識強敏明達吏事終始可稱

裴滿亨字仲通臨潢府人祖虎山移屯東受降城以禦夏人亨性敦敏習儒克奉職大定二十八年擢進士第章宗諭曰朕左右侍臣多以門第顯惟爾由科甲進國家利害其爲朕盡言承安中遷西京路按察使時世襲家豪奪民田亨檢其實悉還正之泰和末轉河東南北路按察使卒於官上聞而惜之賻物甚厚亨厯州郡皆有政蹟可紀

烏古論

語解作烏庫哩

仲溫蓋州按春猛安人大定二十五年進士

爲河東路提刑判官又除東勝州刺史河東南路按察副使貞祐初遷鎮西軍節度使至太原移書安撫使賈益謙約以鄉兵救中都因馳驛如平陽將與益謙會於絳不能進抵平

陽商還仲溫嘗治平陽吏民爭留之仲溫曰平陽巨鎮易爲  
守禦於私計得矣如嵐州何遂還鎮已而元兵大至城破不  
屈死贈資德大夫婆速語解作博索路兵馬都總管謚忠毅歲時  
致祭

王擴字充之中山永平人明昌五年進士大安中僉河東北  
路按察使貞祐二年上書陳河東守禦策大概謂分軍守隘  
兵散而不成軍聚之隘內軍合則勢重饋餉一塗以逸待勞  
以主待客此上策也又曰軍旅猥衆分例過優萬戶一員其  
費可給兵士三十人本路三從宜萬戶二百餘員十羊九牧  
類例可知乞以千人爲一軍擇望重者一人萬戶兩猛安四  
謀克足以教閱約束矣豈不簡易而省費哉又曰按察兼輿  
運本欲假糾効之權以檢括錢穀邇來軍興糧道軍府得而

制之今太原代嵐三軍皆其州府長官如今通掌資儲則獎  
立去按察之職舉矣又曰數免租稅科糴益繁民不爲恩徒  
增廩給教練無法軍不足用書奏不見省興定三年卒謚剛  
毅擴博學多才梗直不容物平章政事高琪忌之以是不振  
於時

移刺益字子遷中都路胡魯土猛安人以蔭補國史院書寫  
承安末遷河東南北路按察使舊制在位官有不任職委所  
屬上司體訪州府長貳幕職許互相舉申益上言此傷體讓  
之風亦恐同官因之不睦別生姦弊乞止令按察司糾劾似  
爲得體又言隨路點軍官與富人飲會公通獻遺宜依準監  
臨官於所部內犯罪究治上皆納焉泰和二年卒於官  
完顏守貞希尹孫襲祖謀克大定二十五年爲西京警巡使

世宗愛其剛直授中都左警巡使遷同知西京留守事御史臺奏守貞治有善狀世宗因謂侍臣曰守貞勳臣子又有材能全勝其兄守道他日可用也明昌初拜參知政事進尚書左丞改西京留守四年召拜平章政事封蕭國公承安元年降授河中防禦使卒謚肅守貞剛直明亮賊否無少隱故爲胥持國輩所忌竟以直罷後趙秉文上書言君子故相完顏守貞小人今參知政事胥持國也

烏古論德升益都路猛安人明昌二年進士爲絳陽軍節度副使大安初除侍御史論西京留守紇石烈執中姦惡衛紹王不聽貞祐初以翰林侍讀權參知政事出爲汾陽軍節度使河東北路宣撫副使改知太原府事權元帥左監軍興定元年元兵急攻太原糧道絕德升屢出兵戰道復通遷官一

階一年真授左監軍行元帥府事元兵復圍太原環之數日  
已破濠垣德升植柵爲拒出其家銀幣及馬賞戰士元軍壞  
城西北隅以入德升聯車塞之三卻三登矢石如雨守陣者  
不能立城破德升至府署謂其姑及妻曰吾守此數年不幸  
力窮乃自經死姑及妻皆自殺贈翰林學士承旨子兀里偉  
語解作烏蘭威幼詔以奉御侍養之

郭文振字拯之太原人承安二年進士累官遼州刺史貞祐  
四年昭義節度使必蘭阿魯帶語解作必蘭阿魯帶請升遼州爲節鎮

廷議遼州城郭人戶不稱節鎮而文振有功當遷乃以本官  
充宣差從宜都提控文振治遼州深得衆心興定三年行河  
東北路元帥府事刺史從宜如故招降太原東山二百餘村  
得壯士七千人十月與張開合堅臺州兵復取太原四年詔



升樂平縣爲皋州壽陽縣西張寨爲晉州從文振之請也又  
言武夫悍卒乞行帥府擅請便宜乞分遣公廉官徧詣訪察  
而澤潞等處芻糧猶廣人民猶衆乞選重臣復置行省皆聽  
節制時澤潞已詔張開規盡不能盡用文振言但令南京兵  
馬使木甲賽也語解作珠嘉賽音行帥府於懷孟而已是歲封晉陽  
公河東北路皆隸焉文振奏孟州每以豪猾不逞之人攝行  
州事朝廷重於更代就令主之去年伯德語解作和攝刺史  
提控伯德安殺之奪其職河東行省以陳景璠代安安內不  
能平因誣告景璠死罪朝廷未及按問安輒逐之恥受臣節  
制宣言於衆待道路稍通當受恒山公節制今正定已不守  
安猶向慕不已臣徵兵諸郡安輒詭辭不遣臣若興師是自  
生一敵非國家之便也聞安有女臣輒違律令爲姪孫述娶

之安遂見許臣非願與安爲姻爲公家計屑就之耳自結親以來安頗循率以從王事法不當娶而輒娶之敢以此罪爲請宣宗嘉其意遣近臣慰喻焉又乞選官安集武仙境土從之五年奏臣所統嵐管陝石甯化保德諸州境土闊遠不能周知利害恐誤軍國大計伏見葭州刺古里甲蒲察語解作瓜勒佳智勇過人深悉河東事勢乞令行元帥府事或爲本路兵馬都總管與臣分治上令擇便地處之仍受文振節制上黨張開以厚賞招文振將士頗有亡歸者詔分遼路粟賑太原饑民開不與文振奏其事詔遣使慰喻焉復請蒲察分治嵐管以西諸州從之又請分上黨粟以贍太原詔文振與開計度頃之詔以石州隸晉陽公府元光元年請遣行元帥府惟良還林州不許又上書乞遣前平章政事胥鼎行省河北諸

公府帥府並聽節制不報二年詔應援史詠復河東是歲遼州不能守徙其軍於衛州

胥鼎字和之繁時人大定二十八年進士入官以能稱至甯初拜參知政事貞祐二年五月宣宗南遷留爲汾陽軍節度使兼汾州管內觀察使十一月改知平陽府事兼河東南路兵馬都總管權宣撫使通達吏事爲政鎮靜三年四月建畜積軍儲備黃河等十三事又言郡再被兵人戶散亡樓櫓未完器甲極少廩庾無兩月食夏田已爲兵蹂復不雨秋種未下雖有復業殘民皆老幼莫能耕種豈足徵求比聞北方劉伯林聚兵野狐嶺將深入平陽絳解河中遂抵河南戰禦有期儲積未備不速措置實關社稷生靈大計乞降空名宣勅一千紫衣師德號度牒三千以補軍儲詔如數亟給之七月

就拜宣撫使兼前職朝廷欲起代州戍兵五千鼎言嶺外軍已皆南徙代爲邊要正宜益兵保定今更損其力一朝兵至何以待之平陽以代爲藩籬豈宜撤去詔從之又言近聞朝廷定令臣清野臣所部乃河東南路太原則北路也敵兵若來必始於北故清野當先北而後南况北路禾稼早熟兵無所掠勢當自止不然南路雖清而穀草委積於北是資兵而召之南也臣已移文北路乞更諭之已而元兵果出境以能設方略退兵進官一階十月言臣所將義軍皆從來背本趨末勇猛凶悍盜竊亡命之徒苟無訓練統攝官以制之則朋聚黨植無所不至乞許臣便宜置總領義軍使副及彈壓仍每五千人設訓練一員不惟預爲防閑使有畏忌且令武藝精熟入各爲用上從之四年正月元兵略霍吉陽三州已而

步騎六萬圍平陽急攻者十餘日鼎遣兵屢卻之且上言臣  
以便宜立官賞預張文勝招還脅從人七千有奇續至者又  
六千餘俱令復業竊謂凡被俘未歸者更宜多方招誘已歸  
者所居從便優加存恤從之二月拜樞密副使權尙書左丞  
行省於平陽時河南粟麥不令輿販渡河鼎言河東多山險  
平時地利不遺夏秋薦熟猶常藉陝西河南通販物料况今  
屢值兵戎農民寢少且無雨雪闕食爲甚又解州屯兵數多  
糧儲僅及一月伏見陝州大陽渡河中大慶皆邀阻粟麥不  
令過河臣恐軍民不安或生內患伏望朝廷聽其輸販以紓  
解州之急從之又言河東兵革之餘疲民稍復然丁牛旣少  
莫能耕稼重以亢旱蝗螟而餽餉所須徵科頗急貧無依者  
俱已乏食富戶宿藏亦爲盜發盡絕無而僅有焉其憔悴亦

已甚矣有司宜奉朝廷德意以謀安集而潞州帥府遣官於  
遼沁諸郡搜括餘粟懸重賞誘人告訐州縣憚帥府鞭箠械  
繫所在騷然甚可憐憫今北兵既去惟宜汰冗兵省浮費招  
集流亡勸督農事彼不是務而使瘡痍之民重罹茲苦是兵  
未來而先自敝也願朝廷亟止之如經費果闕以恩例勸民  
入粟不猶愈於強括乎又言霍州回牛鳳棲嶺諸阨戍卒幾  
四千今兵既去而農事方興乞量留偵候餘悉遣歸有驚復  
徵既休民力且息縣官萬一兵來亦足禦遏是舉一事而獲  
二利也詔趣行之又言河東兩路農民寢少而兵戍益多  
是以每歲糧儲嘗苦不繼竊見潞州元帥府雖設嚮爵恩例  
然條目至少進獻無幾宜增益其條如中都時於是尙書省  
更定制奏行諸路焉又言行省行部宜量民力徵斂交鈔河

宣撫司亦言寶券所支已多民不貴乞驗民貧富徵之然陝西若一體徵收則彼中所有日湊於河東其與不歛何異又河北寶券以不許行河南由是愈滯將誤軍儲而啟釁端時寶券限路分行用因鼎言罷之又言朝廷命擇義軍爲三等臣卽檄所司而潞帥必蘭阿魯帶請從本府所定無輕變易臣竊是其言時阿魯帶奏亦至詔遂許之是歲冬元兵越潼關委知平陽府事權元帥左監軍同知府事完顏僧家奴語解嘉努權右監軍以鎮守河東而率河東南路懷孟諸兵入援拜尙書右丞及元兵還至平陽鼎遣兵拒戰不利乃去興定元年議西征又奏臣近遣太原汾嵐官軍以備西征太原路元帥左監軍烏古論德升甚言其失計臣愚謂德升所言可取付尙書省議之三年正月元兵復入陝西令節制河東八

月上言臣奉詔兼節制近晉安帥府令百里之內止留桑棗  
果木餘皆伐之方今秋收乃爲此舉以奪其事既不能禦敵  
而又害民非計也且一朝驚急其所伐木豈能盡去使不資  
敵乎他木雖伐桑棗舍屋獨非木乎此殆徒勞臣已下帥府  
止之而左都監完顏閭山乃言嘗奉旨清野臣愚不知其可  
詔從鼎便宜規畫九月元兵徇東勝州又令領兵赴河中金  
南渡後書生鎮方面者惟鼎一人宣宗嘗諭委卿河東事果  
能勉力以保無虞哀宗亦曰卿往在河東殘破孤危殆不易  
保卿一至而定迄卿移鎮敵不復侵此晉人官晉者之駿勳  
也仕至平章政事累封英國公正大元年七月卒於衛州  
完顏從坦語解作蘇爾坦宗室子自募義兵二千充宣差都提控貞  
祐二年安撫山西軍民請罷大陽渡粟麥過河禁請寶昌軍



節度使以鹽池利實絳解二州又請陝州帥府戍垣曲平陸芮城虞鄉而河南陝西牧牝馬以濟河東中都之用又請實給河北官俸粟興定初權元帥左監軍行元帥府事同參知政事李華守平陽二年十月奏太原已破行及平陽河東郡縣皆不守大抵屯兵少援兵不至故耳行省兵不滿六千平陽河東之根本河南之藩籬也乞併懷孟衛州之兵以實潞州調澤州沁水端氏高平諸兵並山爲營爲平陽聲援惟祈聖斷以救倒懸之急是月壬子元兵至平陽提控郭用戰於城北濠垣被執不屈死癸丑城破從垣自領十餘騎巷戰手格殺數人知不能支乃自殺贈武昌軍節度使

完顏伯嘉字輔之北京路訛魯古必刺

語解作額爾衮必喇

猛安人明

昌二年進士大安中爲同知西京留守權本路安撫使貞祐

初遷順義軍節度使父母喪起復震武軍節度使兼宣撫副

使提控太和嶺諸隘副統李鵬飛誣殺彰國軍節度使牙改

語解作雅哈詔伯嘉治之貞祐四年三月奏西京副統程瑛復取

渾源白登已命駐宏州臣輒擬瑛昭勇大將軍同知西京留

守事兼領一路義軍制可仍賜瑛夾谷語解作瓜勒佳氏瑛請曰前

代皆賜國姓不繫他族如蒙更賜榮莫大焉詔更賜完顏氏

是月伯嘉遷元帥左監軍知太原府事河東北路宣撫使七

月改知歸德府興定元年知河中府充宣差都提控二年十

二月又以御史中丞權參知政事元帥左監軍行尙書省元

帥府於河中控制河東南北路便宜從事以嘗任中丞忤宰

臣高琪高汝礪也三年至河中奏曰本路衝要不可闕官凡

召辟者每以艱險爲辭乞凡檄召無故不至者宜令降罰悉

心幹當者視所厯升遷詔召不至者決杖一百餘如所請廷議欲棄河東徙其民以實陝西伯嘉上書諫曰中原之有河東如人之有肩背古人云不得河東不雄萬一失之恐未易取也大忤宰執意旋召還入見奏曰如臣鶻鉞固宜召還更須速遣大臣鎮撫上然之又請招撫河北桀黠畧以職名無爲他人所主又曰河東河北有能招集餘民完守城寨者乞無問其門地皆超踰等級授以見職又曰河中晉安被山帶河保障關陝此必爭之地今雖殘破形勢猶存若使他人據之因鹽池之饒聚兵積糧則河津以南太行以西皆不足恃矣元光二年三月遙授集慶軍節度使權參知政事行尙書省於河中率陝西精銳與平陽公史詠共復河東頃之有疾六月卒

把胡魯

語解作呼魯

元光元年正月罷京兆行尚書省以知河中

府事權安撫使時陝西西路轉運使夾谷德新上言曰臣伏見知河中府把胡魯廉直忠孝公家之利知無不爲實朝廷之良臣也去歲兵入延安胡魯遣將調兵城賴以完不爲無功今合達買住各授世封而胡魯改知河中府切謂方今用人之時使謀畧之臣不獲展力緩急或失事機誠宜復行省之任使與承裔共守京兆令合達買住捍禦延安以藩衛河南則內外安矣不報六月召爲大司農正大元年復往陝西拜平章政事卒贈右丞相東平郡王

必蘭阿魯帶貞祐初累官甯化州刺史三年改昭義軍節度使充宣撫副使閏月權元帥左都監行元帥府事節度宣撫如故遣都統興屯喜哥

語解作鄂屯喜格

復取威州及獲鹿縣旣而

詔擇義軍爲三等奏去歲初置帥府部分既定析之將互易其處不相諳委乞無輕變易詔許之阿魯帶繕完州縣之可守者其不可守者遷徙其民依險爲柵以備緩急澤州舊隸昭義軍近年改隸孟州又議遷青蓮寺山寨上言距州既遠地形狹隘恐所保者少所遣者多乃止不遷詔復隸昭義軍是歲潼關失守趨備商州乃陳河北利害畧曰今忻代撤戍太原帥府衆纔數千平陽行省兵亦不多河東河北之勢全恃潞州潞州兵強則國家基本漸可復立臣已將兵離境乞復置潞州帥府行次澠池詔還潞州興定元年乃改僉樞密院事阿魯帶復立潞州最有功議遼州刺史郭文振舉以爲將旣而去潞州張開代領其衆與郭文振不相得文振漸不能守矣

納合蒲刺都大名路猛安人承安二年進士有識慮貞祐中爲戶部尙書言鞏縣以北黃河南岸及金鉤弔橋虎牢關號州嶠嶺凡斜徑僻路俱當置兵防守下省院議竟不施行未幾改元帥右監軍兼昭義軍節度使行元帥府事興定二年潞州破力戰而死贈御史大夫

張開賜姓完顏氏景州人至甯末團結鄉兵固守後自觀州徙軍輝州興定元年遙授澤州刺史三年充潞州招撫使林州元帥府徙潞人實林州旣復遣還開乞隸晉安元帥府或與林州並置元帥府各自爲治十月開以權昭義軍節度使權元帥左都監行元帥府事與郭文振共復太原四年封上黨公以澤潞沁州隸焉五年詔復以涉縣爲崇州從開請也元光元年復取高平縣及澤州二年大戰壺關有功旣而潞

州危急開奏封建公府以固屏翰今胡天祚出平陽郭文振南徙河東公府獨臣與史詠而已乞升澤沁二州爲節鎮以重守禦詔以澤爲忠昌軍沁爲義勝軍林州義尖寨衆亂逐招撫使康塘推杜仙爲招撫使開請以盧芝瑞爲副代領其衆又奏比聞郭文振就食懷孟史詠徙解州高倫遷葛伯寨各自保守民安所仰哉臣領孤軍內無儲待外無應援臣不敢避失守之罪恐益重朝廷之憂正大間潞州不守開居南京部曲離散天興初起攻衛州敗績走死初置公府開與恒山公武仙最強後駐兵馬武山嘗置酒語諸將曰頃以糧竭爲請祈二萬而得二千是吾君相不以武仙輩待我也時郭文振處開西北當兵之衝民貧地瘠開又不奉命以糧賑文振軍文振窮竄開勢愈孤以至於敗

右金十七人

西京河東南北路並各行省

哈瑪爾

原作黑馬

名嶷字孟方伯林于驍勇有志畧壬午襲父職

爲萬戶兼都元帥癸未屯絳州乙酉金將呼濟呼

原作忽察虎

以

兵四十萬復取山後諸州哈瑪爾逆戰隘胡嶺大破之斬呼

濟呼太宗初立三萬戶以哈瑪爾爲首授金虎符充管把平

陽宣德等路管軍萬戶辛丑改都管萬戶統西京河東陝西

諸軍萬戶瓜尔佳孟古岱

原作夾谷忙古歹

田雄等並聽節制尋命

巡撫天下察民利病應州郭志全反脅從誑者五百餘人

有司議盡戮之哈瑪爾止誅其首惡數人餘悉從輕典卒贈

太傅封秦國公謚忠惠

劉世英范陽人元初收雲朔河東以功充行軍副總管庚辰

平陽諸郡被兵後民物空竭世英言於國王曰自古建國以



民爲本今若是孰給轉輸收存恤亡此其時也王善之以絳州邊地奏授絳州節度使兼行帥府事卒於師

石天應字瑞之興中永德人善騎射豪爽不羈屢從穆呼哩

原作木華黎

大小二百餘戰常以身先士卒辛巳秋八月從穆呼

哩征陝右假道西夏自東勝濟河南按葭州穆呼哩表授金紫光祿大夫陝西河東路行臺兵馬都元帥一日謁穆呼哩於汾水東穆呼哩諭以進取之策天應還鎮召將佐謂曰河東西皆平川廣野可以駐軍規取關陝諸君以爲如何或諫曰河中雖用武之地南有潼關西有京兆皆金軍所屯且民新附其心未一守之恐貽噬臍之悔天應曰河中雖迫於二鎮實用武立功之地北接汾晉西連同華地五千餘里戶數十萬若起漕運以通餽餉則關內可克期而定關內既定長

河以南在吾目中矣吾年垂六十老耄將至一旦臥病牀第聞後生輩立功名死不瞑目矣男兒要當死戰陣以報國是吾志也秋九月遂移軍河中既而金軍果潛入中條襲河中天應知之先移驍將吳澤伏兵要路澤勇而嗜酒是夕方醉臥林中金兵由間道已直抵城下時兵燼後守具未完新附者爭縋而去敵乘隙入天應見火舉知敵已入奮身角戰左右從者四十餘騎皆曰吳澤誤我或勸西渡河天應曰先時人諫我南遷吾違衆而來此事急棄去是不武也縱太師不罪我何面目以見同列乎今日唯死而已汝等勉之少頃敵兵四合天應飲血力戰至日午死之穆呼哩聞而痛惜焉初天應死事時弟天禹子佐中在軍中伺敵少懈倒抽其斧反斫之突城而出趨穆呼哩行營求得蒙古軍數千回與敵戰

敗之穆呼哩嘉其勇奏授金符行元帥于安琬襲後授大同等處萬戶

速哥怯烈氏使金不辱命賜護駕士五人昔使過崞州崞人

盜殺其良馬兼以崞民賜之乙未爲山西大達魯噶齊

原作達魯

花回回六人將誅力言其可恕至雲中皆釋之後有至大官者其寬大愛人多類此卒封宣甯王謚忠襄

李守賢字才叔大甯義州人金大安初暨兄廷植弟守正守

忠歸欵命守忠爲都元帥守河東朝廷以全晉爲要害之地

非守賢鎮撫之不可遷河東南路兵馬都總管既至河東人

皆曰吾等可恃以生矣戊子加金紫光祿大夫知平陽府事

兼本路兵馬都總管庚寅太宗南伐道平陽見田野不治以

問守賢對曰民貧窘乏耕具致然詔給牛簡頭仍徙關中生

口墾地河東辛卯平陽當移粟萬石輸雲中守賢奏百姓疲  
敝不任輓載上嘉納之時河中未下守賢建言以爲將士逗  
留沮撓多所傷溺臣請自北面鑿城先登如其言城果下遂  
構浮橋明年由蒲津南濟潼關二月大破趙雄兵於芮城甲  
午卒

張德輝字耀卿冀甯交城人世祖初爲河東南北路宣撫使  
下車擊豪強黜賊吏均賦役耆耄不遠數千里來見曰六十  
年不復見此太平官府矣戴之如神明西川帥耨埒原作取  
兵千餘人守吏畏其威莫敢申理隸鳳翔屯田者八百餘人  
屯罷兵不歸籍會僉防戍兵守河中浮梁故有守卒不以充  
數悉條奏之上可其請兵後羸民依庇豪右及傭工者歲久  
掩爲家奴悉遣還之二年考績爲十路最河東歲歉請於朝

發常平貸之并減其秋租有差賦役不均官吏賦一征十德輝閱實戶編均其等第出納有法數十年之弊一旦革去焉李德輝字仲實通州潞縣人年六十監酒豐州市筆札錄書夜誦不休中統中爲山西宣慰使權勢之家籍民爲奴者咸按而免之復業近千人至元元年授太原路總管時潛藩故傅相無有出爲二千石者上以太原難治故以德輝爲守至郡崇學校表孝節勸耕桑立社倉一權度凡可以阜民者無不爲之嘉禾瑞麥六出其境五年徵入七年命錄囚山西河東行至懷仁民有魏氏發得木偶持告其妻爲厭勝移數獄詞皆具德輝察其寃知魏氏有愛妾疑妾將搆陷其妻召妾鞠之不移時而服遂杖其夫而論妾以死時稱神明

鄭鼎澤州陽城人初爲澤潞遼沁千戶乙巳遷陽城縣軍民

長官中統元年以功遷平陽太原兩路萬戶二年詔統征西等軍戍雁門關隘遷河東南北兩路宣撫使三年改授平陽太原宣慰使至元三年改平陽路總管歲大旱削下車而兩導汾渠修學校建橫澗橋民德之

崔敬字伯恭惠州人至元六年僉山北廉訪司事按部宣甯有李秀坐造僞鈔連數千人皆與秀不相識敬疑而讞之秀曰吾以訓童子爲業捱楚之下不敢不誣服耳敬詢知始謀者乃大同王濁十餘年事不泄而有司誤以李秀爲王濁也移文至大同果得王濁爲真造僞鈔者人皆傳頌之

姚天福字君祥絳州人至元十二年爲河東道提刑按察副使時河東民苦徭役天福劾執政失計奏罷其役徵拜治書侍御史二十八年僧格原作桑哥敗考訊黨援平陽爲多以天福

爲平陽總管俾窮治其事焉富珠哩

原作字木魯

神道碑云憲

河東時開原賑太原民奏和羅朔方

鄭制宜鼎子至元十四年爲太原平陽鴈戶大德八年承命存恤震壓者懼緩不及事晝夜倍道兼行至則親入里巷撫瘡痍給粟帛存者賴之

程思廉字介甫家東勝州成宗初除河東山西廉訪使請減太原餉諸王駝馬數平陽諸郡歲輸租稅北方請輸河東近倉舊法決事有議劄權歸曹吏思廉自判牘尾某當某罪吏皆束手

郭貫字安道保定人大德十一年爲河東廉訪使至大二年仁宗至五臺山貫進見仁宗因問廉訪使穆爾濟達

原作減里吉歹

何以有善政左右對曰皆副使郭貫之教也因賜貫瑪瑙數

珠金繼文

王利用長安人延祐間由翰林出爲河東山西道按察副使文學政事交重於時

楊布哈

原作不花

河兩甯夏人多尔濟

原作兒只

子以蔭補官歷

河東廉訪司事嘗出按部民有殺子以誣怨者獄成布哈讞之曰以十歲兒受十一創且彼以斧殺怨必盡其力何創痕之淺反不入膚耶遂得其情平反出之河東民饑先捐貲以賑請未得命卽發公廩繼之民賴不死天厯初除通政院判將行值陝西諸軍拒路布哈獨率衆出禦呼西人諭之曰民者祖宗艱難所致國家大事何與於民汝等旣昧逆順又欲殘此無辜吾有爲民死爾不汝從也陣潰遂見殺二僕亦見執曰吾主旣爲國死吾縱爲人奴今苟得生他日何以見吾



主於地下欲起殺讐讐要斬之至順二年贈嘉議大夫禮部  
尙書以褒其忠

王思誠字致道兗州嵯陽人至治元年進士授管州判官至  
正初僉河東山西道肅政廉訪司事行部武鄉縣監縣來迓  
思誠私語吏屬曰此必賦吏未幾果有訴於道側者問曰得  
無訴監縣歟汝馬乎其人曰然監縣抵罪吏屬問思誠先知  
之故曰衣敝衣乘駿馬非詐而何陝西行臺言欲疏鑿黃河  
三門立水陸站以達於關陝移牘思誠會二行省憲臣及長  
吏視之皆畏險阻欲以虛辭復命思誠怒曰吾屬旣自欺何  
以責人諸君少留吾當躬詣其地衆惶恐從之河中灘磧百  
有餘里礁石錯出路窮舍騎徒行攀藤葛以進衆憊喘汗弗  
敢言凡三十里度其不可乃作詩歷敘其險執政采之遂廢

其議焉

歸暘字彥溫汴梁人至正五年僉河東廉訪司事行部西京以法繩趙王府官屬之貪暴者王三遣使請不爲動宣甯縣有殺人者蔓引數十人一讞得其情盡釋之沁州民郭仲玉爲人所殺有司以富察實勒原作蒲察山兒當之暘察其誣蹤迹得其殺人者實勒遂不死六年轉僉淮東廉訪司事後開關避兵居夏縣卒

張思明字士瞻家輝州皇慶五年除西京宣慰使嶺北戍士多貧歲凶相挺爲變思明恩威並行邊境乃安

孫德謙河南睢州人任中書省厯大同行省平章事明兵旣克大都元主已北行徐達遣將圍大同德謙嬰城固守自知力不能支乃手書自決作詩數章詞義激烈城陷不屈死

姚行簡太宗癸巳命修理鹽池損壞丙申繪鹽池圖獻於上  
上可之乃立司於池之北許曰路村仍命行簡專掌鹽賦  
趙炳字彥明惠州潯陽人至元九年爲京兆路總管時以解  
州鹽賦給安西王府經費歲久積逋二十餘萬緡有司追理  
僅獲三之一民已不堪炳密啓王曰十年之逋責償一日其  
孰能堪與其哀歉病民孰若惠澤加於民乎王善其言遽命  
免徵焉

鄂屯茂大德時任河東運使建學課士河東運學始於此

高昌閭閻至正九年任鹽運使有善政嘗復解鹽西場均鹽  
利州人思其德爲立碑頌之

那海德俊至正時擢總河陝鹽使請於聖惠鎮修築鳳凰城  
卽今運城也

巴延特穆爾原作卜顏爲運使嚴緝私販課獲充鹽丁撈採

禁役無得侵擾焉

護庫實司雖有惠政均派鹽丁車戶時有造船垣山二役免  
本鎮人不與賣零鹽止收官價交課鈔定鹽草價益鹽勛數  
民便之

右元二十四人各路及分省司鹽